

雲南通志



雲南通志



奏疏

本朝二

請題免白土軍丁銀疏

總督 高其倬 奉天

滇省丁銀額重小民苦於輸將前

臣

等會疏題請經

部議准將民丁丁銀攤入地糧完納竝查無主影射

者將軍丁之最重者量加攤除當卽檄行布政司清

查在案茲據署理雲南布政司印務按察使江芑詳

稱滇省山多田少無主影射田土寥寥無幾以之攤

抵軍丁尚屬不敷更有太和縣白土軍丁一項係前

明萬厯年間因賓川州鐵鎖箐夷人作亂暫令賓川

州趙州雲南縣太和縣四處民人撥防大理府城池
遂立太和所名色至我

朝順治十六年已將賓川州趙州雲南縣三處土軍俱
准復歸民籍惟太和縣土軍二百五十二丁又鄧川
州土軍二十六丁浪穹縣土軍二十五丁每丁派銀
一兩報入徵冊嵩明州土軍一百二十一丁因嘉靖
年間安酋作亂挑撥州民協幫尋甸守城名爲鳳梧
所編出土軍一百二十一丁每丁納銀一兩俱係州
民並非承種軍田之丁再查鶴慶府土軍一百零八
丁亦因鐵鎖箐夷人作亂將太和縣民撥守鶴慶禦

又分防劔川浪穹隨編爲鶴慶土軍伊等在劔川浪穹開挖久荒田地納糧編丁禦官復科使費一百零八兩裁禦歸府竟將一百零八兩之私派編作人丁一百八丁每丁納銀一兩載入正賦是伊等已納錢糧丁差復納此額外土軍之丁銀重累難堪至騰越州土軍丁三百七十三丁上納丁銀三百七十三兩其立名受累情由與鶴慶土軍事同一例以上太和縣嵩明等六府州縣共編土軍丁九百零五丁查屯丁每丁納銀六錢二分二錢八分不等獨此項土軍每丁納銀一兩其賦重倍於屯軍且軍民各有一差

獨此軍旣當民差又當軍差是役之重又加倍於軍民詳請題豁臣覆查無異伏思滇省六屬之白土軍丁銀九百餘兩以明末之流弊重役累民臣何敢壅於

上聞所當

題請豁免伏乞

皇上睿鑒施行

籌酌魯魁善後疏

高其倬

爲詳籌永遠寧謐之策以除野賊積患事竊照雲南魯魁野賊爲害地方情節及各大頭目現就拘繫剿

捕經臣另疏詳

奏在案若不趁此剿捕既施之後詳籌調劑雖目前暫
安難期永遠寧貼欽惟我

皇上聖神文武中外乂安乃猶

宵旰孜孜勤求治理臣荷封疆之寄千載一時何敢因循
故轍苟了目前仰賴

日月之燭照不避紛更之小嫌謹隨地方形勢就臣愚昧
所知籌酌數端冀得永除野賊之患稍靖地方所有
各條謹臚列於後 一雲南歷來野賊頭目平時皆
居元江新平之間若一經生事官兵剿捕則遜入威

遠土州及普洱茶山等處蓋因素係伊等瓜分討保之地夷民歲歲納銀如同租戶甚至井鹽挨日收課商茶按馱抽銀客賈保民任其指使供給食米傳報聲信官兵所向賊已早知消息賊衆所潛官兵難得踪跡所以查拏不易剿捕頗難今雖加懲創目下暫安若不趁此安營設防爲經久之計空虛之地廣袤二三千里內通哀牢外略異域無兵控壓必仍爲野賊暗佔每年索保可得萬有餘金以此招養賊黨必將復聚爲患臣細籌形勢應添設普威一營置叅將一員守備二員千總四員把總八員兵丁一千二百

名令叅將帶兵五百名駐劄普洱令守備一員帶兵三百五十名駐劄威遠又守備一員帶兵三百五十名駐劄茶山其餘汛地量分千把帶兵防守內制野賊外控土司再加以員弁得人整頓不怠則此一方野賊之患自可消弭矣 一野賊巢穴根株全在元江協新營營所轄之地向來營制新營一營止屬臨元鎮管轄與元江協無屬故元新兩界之間一有事端未言剿捕先爭交界互相推卸遲誤事機比及用兵又復參差前後呼應不靈 臣請將新營一營及所擬新設之普威營一併皆歸元江協管轄仍令臨元

鎮統轄則聯絡一氣功過相關於調遣巡防均屬便利矣 一威遠土州之地包魯魁哀牢西南一面歷來爲野賊逋逃之藪野賊敢於恣肆者固由文武玩愒然亦以有此威遠一路可逃及威遠土官可恃也威遠土知州刀光煥平日苛索多端夷民苦累此次又隱藏野賊通風餽食令其實報屢檄不遵經臣一面摺

奏拘拏一面發藩臬二司秉公詳審容臣另行具

題外威遠土州應請改土歸流一則雲省門戶堅完再則夷民如出水火其地請設撫夷清餉同知一員兼

管鹽井經歷一員兼管司獄事并大使二員分管按
板抱母及各處土井煎辦鹽斤再猛班地方離威遠
三百餘里應設巡檢一員就近辦理民事令各員盡
革土司歷來苛派項款與民休息自此以漸化導整
頓則歷來野賊棲託之藪可漸變成內地而夷民永
遠得免土司苛派之苦再查威遠乃極邊瘴癘又係
初闢之地各員請照例揀選調補以三年爲滿如果
稱職請照麗江府改流之例保

題陞用以示鼓勵則新設之員益加奮勉矣 一楊方
普李四姓土官向係招出賊目授以土職原期約束

夷人安靜地方今旣不能約束族舍反聽藉勢爲非
聖朝名器何可濫加查李姓土職久因犯罪革除此次
糾衆騷擾者皆方普二姓族人及其項下夷獍方普
二姓土巡檢先事不行鈐束事後不能捕擒甚屬溺
職查方紹祖普成忠皆屆請襲之年現在請襲應請
永遠停其承襲以示懲創又土縣丞楊世恩此次野
賊之內無伊宗族一人亦無伊屬夷獍又親率土練
隨官兵深入勦捕應仍畱其世職以示獎勵 一名
處旣擬設官添兵則俸薪兵餉以及役使等項均需
支給雲南歲歲借他省之協濟豈容更增繁費查威

遠之新開按板抱母二井前於遵

旨覆奏鹽務利弊事案內計一年可出鹽三四百萬斤請以所出之鹽分銷各屬可以平減通省鹽價今黑井已經加腳減價白井已有沙滷分銷景彌雲阿四小井其價原不過昂惟琅安二井之鹽消售於臨安等處者其價稍貴今又有新經查出麗江之井可出鹽息二千二百餘兩將此減抵其價亦平除於鹽政內另行具

題外查按板抱母二井從前爲野賊及土官土棍所踞不但無分釐歸公兼之野賊騷擾商販亦裹足不前

今經驅除整頓商販流通計一年約可出鹽四百餘萬觔可獲息銀二萬餘兩以充兵餉可以不用另行請增再普洱一帶又報出土井數處向亦因野賊阻撓擅利自肥今現陸續清查整理可將所出一併添助創設之費至兵米一項元江威遠普洱皆產米之鄉應就近籌撥可也 一施和尚之姪臚勒糯利糯片等向來亦非安靜之人此次施和尚被殺臚勒等皆隨官兵奮勇搜捕賊黨頗爲盡力應寬其既往但若縱令仍各居遠寨漫無稽查亦恐將來滋事臣請將臚勒糯片糯利等并其妻子皆令移入元江府城

居住凡有出入皆報明文武官庶該管各官得以稽
查拘束而夷目本身家口俱在城中知所顧畏必不
敢爲非矣 一威遠土官刀光煥及其犯事子弟將
來若仍令畱居故土必致鼓惑滋事請將其家口移
至省城安插臣酌量料理給以恒產俾令得所則萌
孽不滋釁端俱息矣 一向來元新一帶裸夷習於
討保之風其頭目每年所得成千累百名曰年例錢
其後生每年出外一次亦各得三四十兩名曰鞋腳
錢且所到之處醉酒飽肉滿意而歸利之所在趨之
若鶩更兼元新各寨多係各目故居其餘零星小寨

亦各有顛腦耳濡目染以爲徒手可以致富常思起而效之若不嚴加防範難必其故態不萌查各野賊出入有地討保有時九龍江口是其入土司之要道請於九龍江口相近扼要之處及各渡口俱設汛盤查或江外之猺夷欲往江內江內之猺夷欲往江外者皆令該管官給以印票載明人數如山海關之例往還按數稽查卽茶山客商及官弁所差兵役俱一例盤查以嚴出境滋事之弊再元江新平所屬村寨俱令地方官做保甲大意編立里甲記其人戶名口歷來野賊討保必在秋成之後請每年令地方官於

十月十一十二正月四個月之內不時親往稽查如
出外者多必係索保務行跟究懲處不令稍有脫漏
則要路之出入既嚴地頭之稽查又密形格勢禁自
不敢爲非行之既久積習漸除餘患自消矣 一威
遠土州向來土官不容夷人應考恐其入學與之抗
衡又同族爲婚者甚衆倫紀未明除同姓爲婚已飭
該管官諭禁臣又與撫臣楊名時嚴飭各員勤講
聖諭加意化導以變猥俗請再於威遠設立義塾數處令
夷人子弟有志讀書者入塾誦習先暫令於元江附
考請